

Ripoti o le Vaiaso:

Faamalieina le maimoa i tapenaga Polyfest 2017

E talitonu le taofi na matua faamalieina le maimoa a Karaiesetete i le Aso Toona'i na se'i mavae. Ioe, e faatatau lea i siva ma pese o le Polyfest 2017 a le taulaga i saute ua faaiu i le manuia.



E le faigata ona iloa le lotomalie i foliga fiafia ma le nonofo mai se'ia uma lelei le faamoemoe.

O le nofoaga e ta'u o Dallington i Aranui sa aleaga ai laumua a'oga e 18, o se fanua ua tuu i ai le upu sone mumu ona o mafuie na satia le laumua e le'i mamao tele atu. Ae le'i avea lena ma se faamata'u i se isi o le tusa ma se 3000 na tumu ai lea ogafanua, malaga solo mai i itu e fia o le taulaga. O isi e o mai i Malaporoa, e ta le 3 i le vaveao ae taulaga.

O le taeao ina ua uma le lotu na saunia e le alii faifeau, Rev Fitifiti Lutua, na tala malae ai le a'oga fou a Aranui, Haeata, ma faasavali ai loa le polokalame.

E 18 a'oga sa faafiafia i lenei tausaga, i le faasologa o le lisi faafiafia, o Haeata Campus, Middleton Grange, Avonside Girls High, Hornby High, St Thomas, Shirley Boys High, Riccarton High, Marlborough Boys', Marlborough Girls', Burnside High, Marian, St Bede's, Linwood, Villa Maria, Christchurch Girls', ma le Catholic Cathedral na taua lugaia.

E leai se a'oga na faatamala i le valaauina, na matauina le lava tapena o le afaafiafia i itema ta'itasi. O tama ia latou siva masani e mautinoa le le misi o le faataupati. O teine ia latou foi siva masani e aofia ai le ma'ulu'ulu, ma le sāsā mo a'oga e fefiloi tama ma teine.

E iai foi ni a'oga faato'a ulufale ae iloa gofie nā ua leva i le taaloga ma ua tele le potomasani.

Sa fesiligia ni taofi o nisi o le mamalu o matua Samoa sa auai. O le tulafale ia Pouli Pesefeamanaia Poepoe na te matuā lagolagoina lenei fa'atasiga.

“Ou te fiafia tele i lenei faatasiga auā e masani ai tupulaga a Samoa. Ia, ma isi foi uso Pasefika. O le itu ou te fiafia ai o le le faia faatauvaga, o mea na e mafua ai ona feitaga'i tamaiti ae le o le agaga lena o faafiafiaga faaSamoa.” O Poulu sa a'o'oga ona alo i le Shirley Boys.

Saunoa foi le susuga i le faia'oga ia



Tavita Tuiā e lagolago le manatu o Pouli. “O le mea sa matou malilie i ai mai le amataga, e le faatauvāina le faiga o le matou Polyfest, e pei ona fai e Aukilani.”

O le susuga ia Tuiā e faia'oga i le kolisi o Cashmere. O ia le tasi faia'oga sa vaaia la latou kulupu.

O isi tama ma teine tuai o a'oga sa faafiafia o loo lagolagoina pea a latou a'oga e ui ua leva ona tuua a lotoa a'oga. E iai le alii o Albany Pesetā, o le tama tuai a Papanui High, sa iai ma lotolotoi i tapenaga a lana kulupu i lenei foi tausaga.

O Maryanne o se tasi o tamaitai papalagi (pakeha) sa auai o se teine faafiafia, e maua lelei le pese ma taga, fai mai o ia o le Samoa na faate'a e ala i lona auai i la latou kulupu Samoa. Ae to'atele foi isi teine ma tama e le o ni Samoa a ua avea ma Samoa e ala ia tatou faiga fiafia.

Tasi lea vaaiga tu ese i lenei faatasiga, o le avanoa e fefaasoa'i ai tomali o fanau ia latou siva ma pese. Pe tasi le kulupu e fai ma sui o se a'oga, ae mafai ona latou a'o'ina ni siva se tele e iloa ai le tulaga fefiloi o se a'oga e o mai ai.

Na lelei lagolagoina le faamoemoe i tautua masani, e iai le vasega e vaavaaia le saogalemu, puipuiga o taavale, faapea leoleo, ma le tautua faafoma'i.

O nei foi faatasiga e maua ai avanoa o tautua eseese e faailoa atu ai i le mamalu lautele. Sa iai le iunivesite a Kenetaperi ma isi a'oga, auaunaga i le ola maloloina, mo ni faata'ita'iga.

Lelei lagolagoina le tauaofiaga i gasesega a le augasese i taumafa. Maua foi avanoa o nisi o le mamalu lautele e faatau ai ni oloa poo ni mea taumafa ma maua ai sina seleni.

Malie foi tala ma aga a le aualii sa fai ma fofoga o le aso, vae atu o la mamalu.

E pei ona silafia, o le toe aso foi lenei o le Polyfest a Aukilani, talitonu foi sa faamalieina le aumaimoa a Aukilani i taumafaiga a le fanau i lenei tausaga.

O lima e tele e māmā ai le avega: sina tala o le Polyfest a Kenetaperi



I le agaga sailimalo na afuafua ai fatu na pa'u ma ola le tasi, ma iloa i le igoa SpacPac, o le igoa e iloa faatasi ma le laumua o togalaau poo Karaiesetete foi.

O le SpacPac o le taupulega lea e nafa ma le faamaopoopoga o le SpacPac Polynesian Festival a Karaiesetete, iloa gofie i le ta'u Polyfest.

Ua 18 nei tausaga o le tauaofiaga, ma e tusa i molimau o le aso, o se faamoemoe tapua'ia e matua faatasi ma faia'oga.

O susuga i alii faia'oga ia Lealiiee Tofilau Tufulasi Taleni ma Tavita Tuia sa filo ai foi.

Sa amata ona faatalatalanoa le manatu i totonu o potua'oga; e iai le fono a alo ma fanau Pasefika i totonu o le iunivesite a Kenetaperi (UC), ma faasoa atu i nisi o matagaluega a le malo o loo galulue ai tamali'i ma tama'ita'i Pasefika. Ma amata ai le faatasiga i se tulaga faaleiloga. O nai a'oga sa amatamea e iai Aranui, Linwood, Cashmere, Shirley ma faasolosolo a'e ai.

Na tupu ma ola le vao taulagalaga na taulamua ai le mafutaga a faia'oga ona tonu lea ua tataua ona faavae se taupulega e lafo i ai le tiute. E iai le SpacPac. O le 2006 na tuuina atu ai le faafoega o le polyfest ia i latou, lea ua toe faamatuu atu i lalo o le Need Trust, ta'ita'ia e le tama'ita'i loia ia Selma Scott.

Taimi nei ua malosi le tama (SpacPac), o le taupulega lenei e fausia mai sui o matagaluega a le malo o loo tautuaina tagata o atumotu i Aotearoa. E taulamua le matagaluega o a'oga, avea ai le tofa ia Fuetanoa Kose Seinafo ma le auuso o ni sui, ae faapea foi matagaluega o Tagata Pasefika ma isi o loo lagolagoina malosi fuafuaga a le SpacPac i le laumua.

E manatua e Lealiiee le amataga o le tausaga, e iai suafa o nisi ua fa'alo mai ma isi o loo galulue pea—Aneriuea Sopoaga Pa'o Kalolo, Taufao Leota, Mamaitaloa Sagapolutele, Maria Carter, ma isi.

LPS Tavita

Ripoti o le Vaiaso i Ata

Polyfest Kenetaperi 2017



Maimoaga i nisi o vaaiga i le Aso Toona'i SpacPac Polyfest Kenetaperi 2017



Maua se faaopoopoga o ata I luga o le upega tafailagi:
www.ola888.com (faleata~gallery ↓ karaiesetete)

Ripoti o le Vaiaso i Ata

Polyfest Kenetaperi 2017



Nisi o kulupu sa auai i le faatasiga o loo alo i o latou faiva tausala

Falea'oga satia e le asepeso lē fiafia matua

O loo fetoa'i le a'oga tulagalua a Hobsonville i Aukilani ma matua o fanau e a'o'oga ai ona o le mataupu i le saogalemu o a latou fanau i totonu o le lotoa a'oga.

E mafua lea ona o le mataupu i le asepeso (asbestos) na maua i se vaega o le fanua, ma ua faapopoleina ai matua i le a'afiaga o fanau a o faia ni su'esu'ega.

Ia Oketopa o le 2016 na maua ai ni toega faatasi ma se faupu'ega eleele i lumafale o le a'oga ma amata ai loa su'esu'ega.

E le o fiafia matua ona o le faia pea o su'esu'ega i le taimi o a'oga, o le popolega o le aafia tonu ai o le ola maloloina o a latou fanau.

O le iuga ua ave ese fanau a nisi ma faaulu i ni a'oga fou.

E to'atele matua e le taliaina le fa'aauau pea o le su'esu'ega ma ua tatau ona taofia.

A o loo mau eseese matua ma le pulega, ua folafola e le pulega a le a'oga le molia o matua na ua ave ese a latou fanau.

E le o masuiga malie le mataupu e oo mai i lenei taimi.

Mo tatou, e le afea soo i talanoaga lenei mataupu. Mafua lea aua o se faafitauli e lilo i le vaai. E lafi le asepeso (asbestos) i totonu o vaipou ma laupapa ma fa'alo o fale. O lona mata'utia lena.

Tele fale tuai o le malo ma fausaga o vaitausaga 50 ma sau ai e fausia i mea e maua ai i totonu le asepeso.

O le asepeso e ta'u ai ni alavalava o iai ni anomea minerale e mafai ona talitalia le vevela poo au o le eletise ma tetee atu i le 'ele. E faa'oga i le fauga o fale e ui ina ua faato'a iloa mulimuli ane lona sootaga ma le kanesa.

O alavalava o le asepeso ua fefiloi faatasi ma isi anomea e fausia ai laupapa faufale, o sima atofale, fola venia. E faa'oga i totoga o taavale, kalone vaivevela, masini fuluipu, pusa'aiga ma falai uila, paipa, meafaigaluega e faa'oga i galuega taeueletise, e le'i uma le lisi.

Afai e te le o mautinoa le tulaga o lou maota i lenei lamatiaga a le asepeso, saili loa se fesoasoani.

O le asepeso o le mafuaaga lea o le feoti o se 12,000-15,000 tagata Amerika i tausaga ta'itasi, e ala lea i le kanesa ma isi ma'i tuga e tutupu mai ai.

Faasoa o le Vaiaaso:

E mafai e o tatou ta'ita'i ona si'i maualuga ausiga

I lenei vaimasina o tauaofiaga a a'oga i le igoa Polyfest, e manatua le lauga a se tasi atalii a'oga, i le tasi o tauvaga e lei mamao tele atu.

Fai mai lana upu, a e mana'o lava e te palemia e te oo lava i ai, pe e te polofesa e te mafaia foi, ae tatau ona saili le pota ia maua.

O loo silafia e ia le uiga o lana upu, aua na ulufale i le iunivesite, maua e ia ni sikolasipi, maua foi se galuega lelei e tausi ai le aiga.

Ua telē tele le polofesa poo le palemia mo le to'atele, ae mafai e soo se tama ma se teine Samoa ona ulufale i le politeki poo le iunivesite pe a mana'o i ai. Mafai ona iu mai ma se tusipasi lelei e faavae ai se amataga mautu mo ia i tulaga o galuega ma le fa'aaogaina.

Mafai foi e nisi ona laa i luga a'e se'ia tuvae i le nofoa o le polofesa, le palemia.

A fua i le tulaga lagolagoina o alo ma fanau Samoa i aiga ma si'osi'omaga, e malosi le taofi o loo lelei lo tatou fale e faatusatusa i uso Maori poo isi foi.

I se tauaofiaga i Aukilani na vivii mai ai e se tasi tamalii la latou faifeau, faapea mai o le faifeau e agaga tele i le fanau a'oga, e fai lana a'oga e o mai uma i ai fanau o loo tapena mo su'ega o le NCEA. Na te faamalosi atu foi i fanau e toaaga e auai i le Polyfest ma mea na e ta'u ai le aganuu ma le gagana.

I le tauaofiaga lenei i Karaiesetete na tala fiafia mai ai foi se tasi tamā, o le vii lava e tasi. O le matou feagaiga e lauga mai lava ia e to'a'aga e lagolago le fanau ia latou a'oga ma mea'aoga. Ave le faamuamua i fanau ae tuu nisi mea.

Ou te taumate po ua faatele e le susuga lea le viiga ina ua ou tali tali io i ai, ae atonu e faamaoni lava lana molimau.

A o ai e le fia faalogo atu i se ta'ita'i o se nuu poo se ekalesia e lauga mai faapena. Auā e moni le upu, o le fua tatou te lulu nei, e selesele i ai a taeao.

Faapea mai le tamā lea i Aukilani, 'A e fia talitonu fesili i se tasi o le matou pulega, o matou lava le aulotu e tele fanau ua iu mai ma tusipasi i iunivesite a Niu Sila.' O le faatatau o lana tala, e iloga le faifeau e inainā i a'oga a le fanau o lena foi e tauia i le tele o tusipasi mai le iunivesite.

A o ai foi e le fiafia i se aulotu e tumu i fanau atamamai. Auā o latou na o le lumana'i o ekalesia ma aiga ma nuu ma le malo foi.

Talanoa fiafia mai le tamā Karaiesetete i ausiga mata'ina a lana fanau. "E le misi ia



te a'u soo se mea taua'oga a la'u fanau, e oo i lenei tauvaga ou te sau lava e lagolago, ia e faapena lava tatou."

Sa maua foi se avanoa e talanoa ai ma se tasi uso faia'oga i lana su'esu'ega o loo togiina nei mo se tusipasi maualuga, o lana autu su'esu'eina o le ta'ita'iga i mea taua'oga Pasefika. O lana mau o le tasi lea vaega o loo moomia tele se siitaga i luga. Auā o se tasi lea ki—pe a le o le ki i le tatalaina o faitoto'a i seleselega mo a tatou tamaiti ma ni o latou mafaia.

I le lotu e amana'ia tele le upu a le 'tamā o le galuega', i sana faamalosi ma se apoapoa'iga i le fanau, e lava lena e mafai ai e le tama ma le teine ona a'ea le mauga. O isi fanau e faataligatuli i le leo o le tamā ma le tina ae malie ia te ia le leo o le 'tamā faaleagaga.'

I le liuga malie o a tatou faiganuu mai pulega faalenuu e avea ai ekalesia ma 'auga o faamaopoopoga, ua faapena ona maualuga ai le taua poo le mamafa foi o le tiute ua tuuina atu i ta'ita'i o tapuaiga.

E pei ona iloa i Niu Sila nei, ua aofaga Samoa i aulotu e pei o nuu sa masani ai i Samoa. Iina e maua ai le mafanafana i sootaga faalenuu e ala i le gagana, le sauniga ma le aganuu foi.

Iina ua avea ma puna o faafailelega o mea lelei i soo se vaega o le atina'e o se tama ma se teine i lona tuputupu a'e.

E le na'o o le ola faaleagaga ae faapea foi i le atina'e o le mafaufau ma le tino maloloina.

Tele tala fiafia faapea mai tamā ma tina latou te faasoa mai i lenei puletini, e ta'u mai, e mafai ona tatou siitia ausiga a fanau i nisi maualuga e sili atu, pe afai e tutu faatasi o tatou ta'ita'i—aemaise i latou na e amana'ia ma fa'aaloalogia sa latou upu e le fanau.

"mafaufauga o le vaiaaso"

E tofu le mea ma se matagofie, ae le o tagata uma e iloina. Konefusio, filosefā Saina

E MALIE FO'I LAU TALA

O se mea e tu ese ai se nuu

E laitiiti Samoa pe a talanoa i aupaga o gagana a le lalolagi, ae fai lona sao i le gagana aupito telē, le Igilisi, i lana upu tattoo. Mai la tatou upu 'tatau' e faavae ai le faaliliuga a isi uma gagana e tele; ne'i gugutu se Egelani poo se Fiti.

Na'o le 5% o le faitau aofa'i o le lalolagi tagata Amerika, ae 25% o pagota a le lalolagi e maua i lena atunuu. Mamao lava le sili a Meleke. E le ofo se isi.

O Nauru o se tasi o tama'i malo i le Pasefika ae 95% o lona faitau aofa'i e maua i le ma'i puta (obese). Mafua lea i ituaiga mea'ai o loo aai ai. Faatali ea, o lau lava filifiliga ae le o le tuua'i fua o le KFC.

A su'e se malo e sili le tele o ona vaituloto o Kanata. E sili atu i le 3 miliona tuloto poo le 9% o lona eleele e aafia ai. Faatusatusa lena ma malo e iai Lipua, e 99% o le toafa. Malie auā o na laueleele sa lafumalemu foi i se taimi ua alu.

Tele tuua'iga e fai ia Rusia, ae pa'u ane i le 'ea o loo manava ai le lalolagi e iloga lona sao. Tusa ma se 25% o le vaomatua o Siperia i Rusia, o loo liliuina le kaponi tiosite e avea ma okesene.

Tasi le atunuu aupito sili ona 'alofia e tagata o Somalia i Aferika. Mafua lea ona o taua ma fevaevae'iga e mafua i le oge faasauatoa, taua'imisa ai i le leai o ni mea'ai. E le maua lea mea i Samoa e pala le fuata 'ulu.

E le nao vaituloto ma mauga aisa e iloa ai Kanata, e suipi foi o le atunuu aupito lelei a'oa'oina ona tagata. E silia i le 50% e ma'ea a'oga i luga atu o le kolisi. Tulua lea o Isaraelu ma Iapani e tutolu.

O le malo aupito fiafia ona tagata o Tenemaka; tele tupe a Iapani ae faale fiafia tagata; e tu 53.

O se faamanatu mo le tusitala o tala a le fanau, Iolesina Faigame-Tagoilelagi (1945-2017)

Laufatu Samoa

~ O la'u pasese aupito taua ~



Na gata mai le tatou tala i lena aoauli faanoanoa ina ua uma ona lagomau la'u uo o Eva Katana ae tapa mai le loia i se ma feiloa'iga.

Na matou foi ma lo'u to'alua ma le fanau i lo matou aiga, ou te le'i ta'uina i lo'u to'alua le musumusu a le loia. Ina ua taunuu ona ou alu lea i tuafale e nofonofo ai ma tau mafaufau poo le a le uiga o lenei talosaga a le loia.

Ua vave ona faafesoota'i e lo'u mafaufau le teutusi ma le talosaga. Muamua sa ou matua talitonu o tupe la e i totonu o le teutusi, o ni tupe se tele, a o lenei ua toe sui faafuasei i nisi ata fou ua tutu mai nei. Atili ai o lea ua folasia manino le ituaiga tagata e iai la'u uo, o se tamaitai maumea, ua le mapu le saputu mai o le vao manatu pei ni ata pese malie i lo'u mafaufau.

O lo'u manatu, poo le a tonu lava le mea o loo mana'o ai le loia, ua tatau nei ona malamalama lo'u to'alua i mea uma. Tele mea o loo ou nofo ma a'u, e aofia ai ma le teutusi, e le tatau ona ou natia pea nei mea mai ia te ia.

Na umi se taimi o ma faasoaina ma lo'u toalua le fesili, o le a le mea o loo mana'o ai le loia? Ua vave ona toe feala a'e miti soona fai sa tanumia; le ono mauaina o sa'u vaega mai le oloa a Eva Katana. Poo lana uili lea e mana'o le loia e talanoaina? Pe mata ua sauni lo matou aiga mo se suiga tele pe afai e moni lea?

Ua maua le tonu o le teutusi, o le a le tatalaina. O le a tuu faato'a tatala lava i luma o le loia. O le popolega atonu o le mafuaaga lea o le fia talanoa mai o le loia, o se mea o i totonu o le teutusi.

O se vaiaso umi le faataliga o le Aso Tofi, na maua le tonu ma te o ma lo'u to'alua e lagolagoina a'u. Na ou mana'o foi ia iai se isi e molimauina a ma feuma'iga ma le loia.

Ma te taunuu atu i le ofisa o le loia ua leva ona sauni mai le alii. O ia ma lona soa, na faafeiloa'i fiafia mai i ma'ua.

"Ua lelei ua lua o mai ma lou to'alua, e mana'omia se tasi e molimauina la tatou feiloaiga," o le upu faatalofa lea a le loia ma ia ta'ita'i atu ma'ua i se

potu e talanoa ai.

Ua matou nonofo i lalo ma amata loa le talanoaga. E moni lava a ma taumatega ma lo'u to'alua, o le talanoaga e faatatau tonu i le uili a Eva Katana. Na tolaulau e le loia upu i le uili o loo faamatalatala uma ai lona faiga.

Faapuupuu le tala, e to'afa na faamanuiaina, e lavea ai ma a'u. E fa foi ni vaega ua vaevae i ai le tufatufaga. O mea nei—o le fale, o puleiata i ata tifaga ma galuega a le tamaitai, o se tinoitupe e le faailoaina, ma laei ma teuga sa faa'aoga e le tamaita'i i ona ata tifaga.

"Lau susuga," o le loia lea, "o oe lea ua ave i ai le faamuamua e fai lau filifiliga i le mea e te mana'o i ai."

Ua tilotilo i le uili ona toe faapea mai lea, "E tusa i aiaiga mo le tagata e filifili muamua, e pule oe pe filifili se tasi o na mea e fa, pe filifili le teutusi na tuu atu e Eva Katana ia te oe. E tasi lau filifiliga."

Na tuu mai e le loia ma lona soa le avanoa ma te fetuuna'i ai ma lo'u toalua. E mana'o lo'u to'alua i le tinoitupe, o a'u foi ua ta'ina atu i ai, ae pei lava e musumusu mai se leo i totonu. O lea na ou fai atu ai, "Ou te filifilia le teutusi . . ."

Ua atoa nei le 25 tausaga talu la'u malaga i le malo Isaraelu. Sa ou alu e faataunuu le toe mana'o o la'u pasese faapitoa. E ui e tele na tausaga ae peisea'i o ananafi i la'u tilotilo.

Ina ua tatala le teutusi, na toe ina pe le fatu o lo'u to'alua. E le pe i le tele o ni tupe o iai a o le faatauvaa o se mea o loo tuu mai ai. O se pepa pa'u o loo iai ni tusiga i se gagana (faato'a ou iloa mulimuli ane o le Eperu ina ua ou alu i le ave i se faia'oga toeaina e malamalama ai).

E foliga ua sese la'u filifiliga sa fai, ua faanoanoa lava si o'u to'alua.

Ae na lilo i la ma vaai le poto o le fuafuaga a le tina, auā na mafai e le fasi laupepa malo faaleiloga ona ave a'u ma

lo'u aiga i le nuu paia, ma matou maua ai ni faamanuiaga se tele matou te lei mafaufauina.

Ina ua pu'e lo matou ata i le fale mata'aga ma le sui palemia o lena atunuu, na iloa uma e tagata lo'u igoa, faatasi ma le igoa o Eva Katana, ma le igoa o lona to'alua e ana le oloa na ou alu ma a'u. (Na ou iloa ane o lenei oloa o se measina e le mafai e tupe ona faatauina; o se vaega o tusiga paia sa saili e ana sikola mo le faitau seneturi.

I le ripoti lo'u ata ma la'u taavale lanu moana vaivai, i le ulutala, Avefeau a le Atua mai Sini Ausetalia. Na lava ma totoe meaalofo tupe mai lea malo ma a latou Samaria agalelei e fai ai la'u fuafuaga ina ua matou toe taliu i fanua.

Matou te taunuu atu ae fetau ma le faatu o le laupapa i luma o le fale'aiga sa faatafao ai la'u uo ta'uta'ua. Ona tuu lea le taavale ae avea a'u ma pule o le fale'aiga.

E lei leva ona tuu atu le fale'aiga e vaai e la'u fanau a ua ou malolo. Ae a vili mai a'u uo mai Isaraelu ona ou alu lea e faatali. E piki ma avatu sa'o lava i le fale'aiga o Eva Katana.

Toe, e iloa uma e tagata le fale'aiga o Eva, e fia o mai uma i ai. Atili ai foi i le sootaga o le igoa ma le fasipepa ta'upa'iaina lea ua toe faafoi i tagata Isaraelu e ana.

Taimi nei ua ou maua uma mea o le uili a Eva Katana; na mafai ona ou faatauina uma mai i le isi to'alua ina ua talosaga mai.

I nisi taimi ou te nofo ma toe faasolo i tua o'u mafaufauga. Atonu o so'u faamanuiaga i le talileleia o a'u pasese e aunoa ma lo'u faia o ni faamasinoga faaletagata.

Auā e moni le upu, e te le faamasinoina le aano o se tusi i sona faavaa; e te le iloa poo se agelu lena ua e faaulufale i lau taavale—lou taimi—lau tatalo—lou lalolagi.

O Eva Katana lena agelu mo a'u. O lana tala ua avea foi ma a'u tala, o se tala o le alofa, faamagalō, ae fua mai i manuia e tele mo se avetaavale faatauvaa.

Malo le faitau, o le iuga lena o le tatou tala.



19—25 MATI

19
1999 Tuua le malo e Tofilau
Eti Alesana

1998 Tauto Tuilaepa avea ma
palemia lona 6

1985 Toe tofia Tofilau Eti
tofi palemia

1973 Toe tofia Fiamē Mataafa
tofi palemia

20
1970 Goto le vaa la'uuta Betty
Lou i le vainuu Apolima-
Manono; malii ai se alii ma se
pepe

21
1928 Suia Risatisone e William
Nosworthy

22
1989 Suiselani. Saini e
Samoa le Basel Convention

1899 Sunui e 'au a le malo
nuu afua mai Faleata e aulia
Satapuala; Laulii e aulia
Fagaloa i sasa'e; Safotulafai
Savaii (Te'o Tuvalet)

23
1899 Alaga le tupu o Tanumafili
e Amerika & Peretania

24
2001 Malo David Tua ia Daryl
Nicholson, T6

1976 Malo Tupuola Efi tofi
palemia a Samoa

25
2015 Niu Sila. Aulia 40 tausaga
Polyfest Aukilani

1985 Tauto Tofilau Eti Alesana
palemia lona 5 a Samoa

1883 oso se afa malosi gogoto
ai ni vaa se 8 sa tuta i Apia



O se tasi o filifiliga faigata i le maota

E iai taimi le 'aumaua ma tu ese na e naunau se tusiupu o se talafaasolo e pu'epu'emaue ae le 'aumafai. Ua na'o upu e faamatala ai ae le lanu ai le uiga ma le lagona. Faato'ā 8 tausaga le matua o le tuto'atasi, o loo tu mai Fiamē Faumuina Mulinu le 2 i le tofi. Fulisia pea le atunuu e ala i ona sui e lagolago le sui o Lotofaga, poo le tamaaiga fo'i, se'ia faaluaina le filifiliga i le palota o le 1970, ina ua faatu mai e isi sui le suafa o Tupua Tamasese Lealofi le IV. O Tupua Tamasese e fou mai i le palemene, e fou fo'i i upufai faalenuu ma faaleitumalo, o se foma'i i lona faiva, e le faatusalia i le potomasani o lana paga ua tele tausaga o galue. Ae na malo Tupua i le filifiliga, 25 i le 20 a Fiamē Mata'afa. O le taimi muamua lea ua filifili ai le atunuu i se tamaaiga e aunoa ma le uia o ala faatua o nuu sa masani ai 'aiga'. E manatua lea taimi auā sa tele ai tala o fono a matai ma le mamalu lautele. Ae na'o tala, ua leai se taunapa i se 'o'e ma se laau malosi. Pau le mea na mamafa i ai talanoaga o le faama'ite a nisi sui i le tulaga o tamaaiga i upufai o le atunuu. E iai se sui na faameo i le ave o le ao, ave le manava toe ave ma le i'u. E faatatau i le faumalo a tamaaiga i vaega e tolu (tofi o le ao, sui o le fono, ma le palemia). Na toe filifili Samoa mo le sui o Lotofaga i le palota o le 1973, ma avatu foi i totonu o lana kapeneta lē sa la tauva. Ina ua malii faafuase'i Mata'afa i le 1975 ona toe se'ei lea o Tupua Tamasese i le tofi. Na ulufale faatasi Tupua ma le sui tama'ita'i muamua i le suafa Taulapapa Faimaala. O le fofoga o le fono i lea taimi o Magele Ate, nofoia le nofoa talu le 1964, e so'oa Amoa Tausilia le ulua'i fofoga fetalai a Samoa tuto'atasi. Pe toe lua ni suafa o totoe ma soifua pea o lena paea'iga.

Fesili mo oe: O ai le suafa o le toeaina na tauva ma Fiamē mo le tofi palemia i se tasi filifiliga a le palemene?

Mati i le Tala Faasolo o Niu Sila

19 Mati 1839. Aumai i Niu Sila le pi e gaosia le meli

20 Mati 1834. Filifili le ulua'i fu'a a Niu Sila

22 Mati 1902. Amata tautua a le ulua'i polofesa a Vitoria,
George von Zedlitz i mea taugagana

23 Mati 1848. Taunuu le vaa *John Wickliffe* ma le aupasese
mai Sikotilani, ulua'i tagata na faavaea Otako (Otago)

NIUPAC PUBLICATION

Email: evaleon.books@gmail.com
Phone: (03) 382-6674
Postal: 39 Basingstoke Street,
Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING


Telefoni (03) 382-6674. Imeli: evaleon.books@gmail.com



Sponsors:

New Zealand
Lottery Commission

Evaleon Books &
Niupac Publishing





PASI ATU LA
TATOU PULETINI
I LE TOU A’OGA,
AIGA, LOU TUAOI,
AU UO, E AOGĀ MO
LE FANAU A’OGA

Igoa: Sagato Paterika
Aso Fanau: se taimi o le 4
seneturi TA, 386 pe a
Ausiga: Sagato tausì a tagata
Aealani
Fetu:



O se tasi o sagato aupito faamanatuina i le soifuaga o Sagato Paterika. Mafua lea ona o lona tulaga amana’ia e tagata Aealani, ua filifilia ai o ia o se Sagato Tausì, avea ai le aso 17 o Mati i tausaga uma ma ona aso faailoga. O lona tala e pei o se fagogo malie—mai se aiga Roma tualoa, pu’eina e ni faomea, faatau atu o se pologa, liua i le Kerisiano, sau o se misionare i Aealani ma maloina loto o lena atunuu. I Farani ina ua sa’oloto na a’oa’oina ai i le galuega tala’i, avea ma epikopo i le 432 TA ma auina atu e Pope Selesitine e tala’i le tala lelei i Aealani. I le amataga sa tete e mai le to’atele ae na alu a’i talia lelei o ia. E iloga lona sao i le faavaeina o le tapuaiga Katoliko i totonu o lea malo. Tele ni talatuu e faavae i lona soifua galue o loo manatua ai pea o ia.

www.ola888.com

ATI A'E UPU

tauaofiaga. Vasega—nauna. Potopoto ni tagata se to’atele mo se faamoemoe taua; o mai faatasi e faataunuu se fe’au taua, ft. fonotaga, tauvaga mmf. Soa Peretania—gathering, rally, convention

Tulimanu o Pola

Vaiaso o lagona
faagaeetia ma le
asiasiga ia Maui



E fiafia foi e toe faatalofa atu i le suafa o lo tatou alii manumalo, malo le pale. Ia, e le taumate sa maua se maimoaga malie i sausaunoaga matagofie a le fanau i lena vaiaso. Pauu faatasi taimi o faatasiga e lua mo taulaga tetele o se ’ai lapo’a lea mo tatou uma. Faamalo atu foi i fanau faato’a ulufale i le tauvaga; ia malo le faatoatoa, taimi muamua e lagona le pala’ai ae fai fai lava lelei pei o upu a tamaiti. Fiafia foi nai matua i le vaai atu ua e siva mai. Malo lava. Mafatia lava i le tala i si alii faafiafia alofagia o Pio Terei ma le motusia o le mafutaga ma si ona atalii. Iloa atu lava i luga o le TV le faigata ia te ia ma le aiga o le tete’aga. Tatou te malamalama, iai nisi o tatou ua oo foi i ai. O le mea sa fia maua e le atalii o le suavai ga’o lena i totonu o le ponaivi e lavea’ia o ia mai le kanesa. Peita’i e le’i manuia le sailiga. Ua faailoa i lenei mafatiaga o se alii ta’uta’ua le faafitauli o loo fia maua sona tali. Mana’omia se naunauga i o tatou tagata Pasefika e fesoasoani i gasegase faapea. Tau ina ulufia le agaga faanoanoa mo Pio ma le aiga ma uso mafatia uma foi. Ese foi le manaia o le tilotilo atu i fanau Pasefika o sisiva mai ia tatou siva, le tama Fiti e faataupati le teine Lalotoga e onomea i le mauuluu. O la’u fesili, aisea e faigofie ai i fanau ona pu’e taga o siva eseese ae alu se taimi o tau pu’e se fomula o se numera? Faamata e le o le ki lea i le siitia o le literacy, o le liliu o gagana Pasefika i ni taga o ni siva? Ia, o ai na iloa pe le o le siva Samoa le faaolataga o le mou atu o le gagana. Pe alu a’i lē toe talanoa i ni upu ae fai le faatau e ala i siva? Malie foi. Ia, o se fiafiaga mo a’u ina ua faapea mai le loomatua ma te o e vaai le saualii e igoa ia Maui. Ua leva ona sau le Moana a o lea faato’a tilotilo lenei aiga. Ia, manaia tele le ata, mea sili mo a’u o le faailoa o a tatou saualii, i lo le saga talanoa i saualii a Eleni ma Isaraelu. E leai se mea o iai, a ua ova foi le talanoa ia Koliata ma Apolo, manaia foi se lauga o le Aso Sa ia Maui. Toe itiiti lava a tagulu le to’alua o Maui. Na vave ona lavea’i e Maui na liu aeto. Ae na maoga le gulu a le isi toeaina na pito i luma. Taumafai si ana fanau laiti e lavea’i. Po ua ova le taumafa i le popcorn pe a. A ia manuia lava le vaiaso.